

Audrey Blignault

Audrey Blignault was 'n geliefde [Afrikaanse](#) skrywer, wat van 1916 tot 2008 geleef het. Sy was veral bekend vir 'n gewilde radioprogram en haar **essays** wat in die *Sarie*-tydskrif verskyn het. Sy is ook bekend daarvoor dat sy 'n leeskultuur bevorder het en het graag haar liefde vir boeke met ander mense gedeel.



Grootwordjare en studies

Sy is op 6 Julie 1916 as Audrey Bettie Swart op die plaas Heuningrug, Bredasdorp, in die Overberg-streek gebore. Haar prokureurpa se naam was Johannes Jochemus Albertus Swart en haar ma, Maria Swart (née Kennedy), was 'n musiekonderwyseres van Ierse afkoms. Sy het 'n suster, Yvonne, en twee broers, Ken en Christopher, gehad.

Haar ma was Engelssprekend en haar pa Afrikaanssprekend, maar albei kon baie goed Afrikaans en Engels praat. Hul huis was gevul met musiek en boeke, en Blignault was van jongs af 'n ywerige leser. Sy het vertel dat sy ook vir Kersfees [boeke](#) gekry het, en sy kon nie wag om by mense te gaan kuier om by hulle boeke te leen nie.

Blignault het reeds op 11-jarige ouderdom 'n Engelse gedig oor Bredasdorp geskryf, wat in 'n plaaslike koerant gepubliseer is. Sy het op Bredasdorp skoolgegaan en in 1933 daar gematrikuleer.

Hoewel nie baie vroue daardie tyd studeer het nie, het haar pa haar en haar suster haar aangemoedig om ná skool verder te studeer. Sy het 'n BA-graad aan die Universiteit Stellenbosch (US) voltooi. Sy het ses jaar daar studeer en haar **magistergraad** in Afrikaans en Nederlands met onderskeiding verwerf, asook haar sekondêre onderwysdiploma voltooi. Sy het in daardie tyd ook artikels vir *De Stellenbosse Student* geskryf.

Blignault het ook 'n tweetalige onderwysdiploma in voordrag en toneel verwerf en het in 1940 die onderwys betree. Sy het eers klas aan die Wellingtonse Opleidingskollege gegee en het daarna by die Rynse Meisieskool op Stellenbosch

skoolgegee. ¹



Loopbaan en lewe

Sy en Andries Blignault is op 28 Junie 1941 getroud. Haar man was van 1942 tot 1945 hoof van die Jan Kriel-skool in Kuilsrivier, en dit is daar waar hul enigste kind, Marié, op 24 September 1942 gebore is.

Haar man, Andries, het in 1945 besluit om voltyds medies te studeer, en sy het **redakteur** van *Die Huisvrou* geword. Sy het dié pos vir 11 jaar bekleed en het daarna dieselfde pos by 'n gewilde maandblad *Die Naweekpos* bekleed. Andries het intussen klaar studeer en 'n **psigiater** geword.

Blignault is in 1946 gevra om die openbare uitsaaier, die [SAUK](#) (vandag ken ons dit net as die SABC), se *Vrouerubriek*-program te begin. Dit was 'n baie gewilde program wat sy later daaglik uitgesaai het. Sy het die program uiteindelik 46 jaar lank uitgesaai.



Benewens haar gewilde *Vrouerubriek*-program het sy ook die programme *Wat kan ek lees?* en *Boeke vir ons kinders* op die radio uitgesaai. Dit was vir haar belangrik om mense te inspireer om te lees, en sy het baie oor boeke oor die [radio](#) gepraat en ook praatjies daarvoor gelewer. Sy het 'n groot invloed op lesers gehad, en boekverkope het dikwels toegeneem omdat sy dit op haar programme bemark het.

Sy was ook bekend vir haar gewilde essays in die vrouetydskrif *Sarie*. Die rubriek het op 23 Augustus 1950 afgeskop en is "Uit die dagboek van 'n vrou" genoem.



Tragedie tref

Blignault en haar man was op 2 Mei 1967 in 'n ernstige motorongeluk betrokke, en haar man is oorlede. Sy was self ernstig beseer en was ná die motorongeluk in

'n koma. Sy het gelukkig van haar beserings herstel en het in 1970 weer getrou, hierdie keer met Attie de Villiers. Hy was 'n ondersekretaris in die [parlement](#), en sy het hom eintlik 33 jaar vantevore ontmoet toe hy 'n vervolghverhaal vir *Die Huisvrou* geskryf het. ²



Haar loopbaan floreer

Blignault het in 1955 haar essays, wat reeds in *Sarie* verskyn het, in 'n bundel, *In klein maat*, saamgevoeg en gepubliseer. Dit was egter slegs die begin van 'n reeks gewilde bundels wat sou volg.

Sy was ook in 1960 redakteur van die reeks *Juweelnovelles*, 'n reeks boeke wat uit die wêreldletterkunde in Afrikaans vertaal is.

Sy was baie lief vir **prosa**, [poësie](#) en reis, en haar bundel essays *Die verlange loop ver* (1969) het oor haar besoeke aan die grafte en woonplekke van skrywers en digters gegaan. Sy en haar man, Andries, was in 1966 op 'n wêreldreis en het daartydens baie skrywers se huise besoek.

Blignault het in die jare negentig ook 'n reeks in die tydskrif *Insig* wat oor die wêreldletterkunde gehandel het, geskryf. Dit is ook in 'n bundel saamgevoeg getiteld *Die eindelose avontuur*, wat in 1993 verskyn het.



Laaste jare

Die paartjie het in 1992 van hul huis in Kampsbaai na 'n aftree-oord in Tuine in die Kaap getrek. Blignault is op 92-jarige ouderdom op 1 Oktober 2008 in 'n hospitaal in [Kaapstad](#) oorlede. ³

Bekronings

Blignault is verskeie kere in haar leeftyd bekroon. Sy het in 1961 die gesogte [Eugène Marais](#)-prys vir *In klein maat* en *Die vrolike lied* gewen, en in 1965 die

W.A. Hofmeyr-prys vir *Met ligter tred*. In 1980 word die Italiaanse Adelaide Ristori-prys aan haar toegeken. Die Adelaide Ristori-kultuursentrum in Rome ken elke jaar 50 pryse toe aan vroue op grond van die leidende rol wat hulle in kultuur speel, en die eer het Blignault in 1980 toegekom. Sy het ook in 1982 die Dekorasie vir Voortreflike Diens van die Suid-Afrikaanse regering ontvang.

Haar geboortedorp, Bredasdorp, het in 1988 **ereburgerskap** aan haar toegeken, en die US het haar in 1990 met 'n **eredoktorsgraad** vereer.

Blignault was ook die eerste vrou wat tot die fakulteitsraad van die Suid-Afrikaanse Akademie vir Wetenskap en Kuns verkies is. Die akademie het ook in 1994 erelidmaatskap aan haar toegeken.

In 1997 ontvang sy 'n prestigetoekenning vir haar **voortreflike** diens aan die Universiteit en die Suid-Afrikaanse [gemeenskap](#) van Die Klub van Sudenteraadvoorsitters aan die US.

Sy is ook in 2000 deur die ATKV met 'n prestigetoekenning vereer, en in 2005 met die Kanna-*Insig*-prys vir haar lewenslange bydrae tot Afrikaans. ¹



Blignault se skryfwerk

Titel	Literêre vorm of genre	Publikasiedatum(s) van uitgawe(s)	Plek en uitgewer
<i>Met eenheid van hart</i>	Godsdienstige lektuur	1938, 1942	Kaapstad: HAUM
<i>Die uitdaging van die huwelik</i>	Godsdienstige lektuur	1960	Kaapstad: HAUM
<i>In klein maat: uit die dagboek van 'n vrou</i>	Essays	1955, 1956, 1958, 1960, 1963, 1966, 1968, 1969, 1970, 1975	Kaapstad: Nasionale Boekhandel Kaapstad: Tafelberg

<i>Die vrolike lied</i>	Essays	1957, 1960, 1961, 1966, 1968, 1969, 1971	Kaapstad: Nasionale Boekhandel Kaapstad: Tafelberg
<i>Die dammetjie en ander sketse en essays. (bydraes deur Audrey Blignault, Alba Bouwer, Freda Linde, Elise Muller, M.E.R. en Rykie van Reenen)</i>	Essays	1961, 1962	Kaapstad: Tafelberg
<i>Met ligter tred</i>	Roman	1963, 1964, 1965, 1966, 1967, 1970, 1971	Kaapstad: Nasionale Boekhandel
<i>Die blye dae</i>	Essays	1965, 1966, 1969, 1978	Kaapstad: Nasionale Boekhandel Kaapstad: Tafelberg
<i>Die plesierboom</i>	Essays	1967, 1968, 1969, 1971, 1973, 1991, 1994	Kaapstad: Nasionale Boekhandel Kaapstad: Tafelberg Pretoria: Daan Retief Kaapstad: Ametis
<i>Om die son te aanskou</i>	Essays	1968, 1970, 1978	Kaapstad: Nasionale Boekhandel
<i>Die verlange loop ver</i>	Reissketse	1969, 1971, 1978	Kaapstad: Nasionale Boekhandel Kaapstad: Tafelberg
<i>Die rooi granaat</i>	Essays	1970, 1971, 1974	Kaapstad: Tafelberg
<i>Die wind van die see af</i>	Essays	1972	Kaapstad: Tafelberg
<i>Nogtans sal ek jubel: 30 essays en vertellings, saamgestel deur Elize Botha</i>	Essays	1977, 1985	Kaapstad: Tafelberg
<i>Pasop vir Jantatarat</i>	Essays	1979, 1981, 1988	Kaapstad: Tafelberg

<i>Van leser tot leser: 'n gesprek met leeskringe</i>	Handleiding	1980	Kaapstad: Tafelberg
<i>Die goue vreugde: 'n keur uit jare se leesgenot</i>	Essays	1985	Kaapstad: Human 'n Rousseau
<i>Oulap se rooi: 32 essays tot lof van blydschap, ingelei deur Berta Smit</i>	Essays	1989	Kaapstad: Tafelberg
<i>'n Groet van Audrey</i>	Essays	1992	Kaapstad: Tafelberg
<i>Die eindelose avontuur: 'n venster op die wêreldletterkunde</i>	Essays	1993, 1994, 2020	Kaapstad: Tafelberg Pretoria: Protea Boekhuis
<i>Dit reën rose: beeld van 'n kindertyd</i>	Essays	1996	Kaapstad: Tafelberg
<i>Mal Hansie en ander verhale: 'n keuse (saamgestel deur Elize Botha en Hennie Aucamp)</i>	Kortverhale	1996 2020	Kaapstad: Tafelberg Pretoria: Protea Boekhuis
<i>'n Blywende vreugde: briewe van Audrey Blignault (saamgestel deur Lynne Fourie, Marina Brink en Petrovna Metelerkamp)</i>	Briewe	2008	Hermanus: Hemel 'n See Boeke
<i>Met my rooi rok voor jou deur (saamgestel deur Lana Burnett)</i>	Essays	2020	Kaapstad: Tafelberg



Woordbank

biografie	Die geskiedenis van iemand se lewe wat beskryf word; lewensbeskrywing.
ereburgerskap	Iemand word op 'n spesiale manier vereer deur 'n burger van die stad genoem te word.
eredoktorsgraad	'n Mens kry 'n eredoktorsgraad vir uitsonderlike prestasies, maar jy hoef nie 'n eksamen af te lê nie.
essays	Afkomstig van die Franse <i>essai</i> . 'n Kritiese maar persoonlike bespreking van enige onderwerp in prosa, sonder om die betrokke onderwerp uit te put. Die doel van 'n essay is om 'n standpunt te stel, die leser tot 'n bepaalde insig te probeer oorreed, of om 'n gesprek te stimuleer.
magistergraad	Die graad wat 'n mens ná 'n baccalaureus- of honneursgraad doen; meestersgraad.
prosa	Geskrewe taalgebruik, veral as letterkundige genre.
poësie	Die werke van digters of 'n versameling gedigte.
psigiater	'n Dokter wat in die sielkunde spesialiseer.
redakteur	Iemand wat rigting gee en toesig hou oor die beleid van 'n publikasie.
voortreflike	Baie goed; uitstekend.

Lees hierdie artikels om nog meer te leer oor Audrey Blignault

- [Wie was Audrey Blignault?](#)
- [Bekroonde skrywer van menigte essays en kortverhale](#)
- [10 bundels essays in 40 jaar](#)

Kyk hierdie video's om nog meer te leer

oor Audrey Blignault

Blignault se lewe opgesom in 60 sekondes